

## صالة وصول

هنا المطار ... صالة وصول  
و إكمني بفهم في الأصول  
سميت بقلبي و باليمين خطيت  
دارت عنيا ف المكان بندول  
بتقولي يا أهبل ليه فارقت البيت  
عاجباك وشوش الغُرب يابن الأيه!!  
إياك تروح للزينة و الفساتين  
كان كل همي استوعب اللي انا فيه  
خايف من التوهه و م التايهين  
وسع المكان ملكوت و انا سارح  
و الخلق ياما لحد مد العين

هايمين و كل في فلك سابح  
من كل جنس و كل مله و دين  
السير سحبنى ولف بيا و دار  
شبابيك كثيره و ختم سلم ختم  
طوابير بشر تتعد بالامتار  
و كله ماشي وفق نفس الريتم  
هنا المطار .. هنا المطار  
باب الخروج فى الانتظار  
خطيت عتبه نسيت هوا التكيف  
و لفحنى صهد الخليج بالنار